

**BOSANSKO-PODRINJSKI KANTON**  
**VLADA**  
**BOSANSKO-PODRINJSKOG KANTONA**



**PROGRAM RAZVOJA**  
**BOSANSKO-PODRINJSKOG KANTONA**  
**GORAŽDE DO 2014. GODINE**

Na osnovu Člana 9., Člana 15., Člana 16., Člana 17., Člana 18., Člana 35., u vezi sa Članom 23. Stav 1. Tačka e.) Ustava Bosansko-podrinjskog kantona, Skupština Bosansko-podrinjskog kantona, \_\_\_\_\_ sjednici održanoj \_\_\_\_\_ 2011. godine, donosi:

**PROGRAM RAZVOJA  
BOSANSKO-PODRINJSKOG KANTONA  
GORAŽDE DO 2014. GODINE**

**I. OSNOVNE ODREDBE**

1.)

U cilju razvoja demokratskog, prosperitetnog i otvorenog društva, Skupština donosi Program razvoja Bosansko-podrinjskog kantona.

Program razvoja sadrži principe, ciljeve i zadatke ekonomske, socijalne i razvojne politike kantona.

Program razvoja se donosi za period od 2011. do 2014. godine.

2.)

Program razvoja kantona utvrđuje:

- Svrhu, temeljne vrijednosti i principe razvoja Bosansko-podrinjskog kantona;
- Strateške i ključne ciljeve programa razvoja;
- Prioritetne zadatke javne uprave do 2014. godine;
- Prioritetne reforme, programe, projekte, aktivnosti i mjere do kraja 2014. godine;
- Proces implementacije;
- Način finansiranja;
- Mehanizme monitoringa i evaluacije;
- Očekivane rezultate;
- Nadležnosti organa uprave i mehanizme saradnje i koordinacije.

3.)

Vlada kantona je nadležna za provođenje Programa razvoja.

Javne ustanove i preduzeća će uskladiti svoje ciljeve sa Programom razvoja.

**II. SVRHA PROGRAMA RAZVOJA**

Svrha programa razvoja je:

- Osiguranje poštivanja najvišeg nivoa ljudskih prava zagarantvanih Ustavom;
- Pružanje adekvatnog odgovora na urgentne potrebe stanovnika kantona za zapošljavanjem i boljim standardom života;
- Kreiranje okvira za sveobuhvatnu reformu javne uprave koja će biti efikasnija u reagovanju na materijalne, ekonomske, socijalne, zdravstvene, kulturne potrebe i probleme pojedinaca, porodica i zajednica;
- Definisane razvojne politike i prioriteta ciljeva do kraja 2014. godine i određivanje nadležnosti Vlade, javnih ustanova i preduzeća za njihovo provođenje;
- Osiguranje efikasnog monitoringa i evaluacije rada javne uprave od strane Skupštine Bosansko-podrinjskog kantona, civilnog društva i građana.

**III. TEMELJNE VRIJEDNOSTI I PRINCIPI**

1.)

Temeljne vrijednosti Programa razvoja su:

- da sve aktivnosti javne uprave moraju imati pozitivan uticaj na razvoj ljudskih prava i ravnopravnosti muškaraca i žena;
- da je najviša težnja građana poboljšanje životnog standarda i uživanje slobode od siromaštva, nezaposlenosti i bolesti;
- da je osiguranje dostojanstvenog standarda života temelj na kojima trebaju da počivaju svi napori usmjereni na razvoj;
- da se nadležnosti kantona u kreiranju i implementaciji politika provodi u skladu sa potrebama stanovnika samostalno, zajedno i

koordinirano sa Federacijom Bosne i Hercegovine;

2.)

Temeljni principi Programa razvoja su:

- da kreiranje i provođenje politika u oblasti privrede, socijalne i zdravstvene zaštite, boračkih pitanja, obrazovanja, uprave, radnih odnosa i prostornog uređenja predstavljaju prioritet u radu javne uprave;
- Da se prilikom kreiranja politika obavezno vodi računa osiguranju pozitivnog utjecaja na proces Evropskih integracija.
- da u izvršavanja svoje nadležnosti kanton samostalno donosi propise i odlučuje o organizaciji i radu javnih službi, odnosno u dogovoru sa Federacijom BiH u slučaju da je na taj način omogućeno efikasnije i racionalnije vršenje nadležnosti;
- se prilikom kreiranja i implementacije kantonalnih politika osigurava potpuna saradnja organa uprave koja omogućava djelotvornije, efikasnije, efektivnije djelovanje i racionalno korištenje javnih resursa;
- da posebno ranjive kategorije stanovništva imaju dodatni podsticaj za poboljšanje njihovog životnog standarda;

#### IV. STRATEŠKI I KLJUČNI CILJEVI

1.)

Strateški ciljevi:

- Osiguranje snažne privredne infrastrukture koja omogućava zapošljavanje u konkurentnom privatnom sektoru, blagostanje i rastući životni standard uz održivo korištenje prirodnih resursa;
- Povećanje mogućnosti za sve, a posebno za starije ljude i porodice u stanju socijalne potrebe da ostvare bolji život, da imaju kvalitetnu zdravstvenu zaštitu, dobro obrazovanje i kvalitetne socijalne usluge;
- Integriranje ekonomskih, socijalnih i kulturnih politika kako bi one postale efikasnije u osiguranju ukupnog razvoja;

- Osiguranje efikasnog, transparentnog i odgovornog upravljanja i administracije u javnom sektoru;

- Kreiranje materijalnih i društvenih uslova koji omogućavaju povratak raseljenih lica i izbjeglica u sigurnosti i dostojanstvu u mjesta njihovog porijekla i njihovu nesmetanu reintegraciju u njihova društva;

2.)

Ključni razvojni ciljevi Vlade Bosansko-podrinjskog kantona do 2014. godine:

- Ubrzanje privrednog razvoja kantona i rješavanje suštinskih ekonomskih i socijalnih problema, a posebno onih povezanim sa nedostatkom posla, siromaštvom, bolešću i starošću;
- Provođenje sveobuhvatne reforme javne uprave po standardima koji važe u zemljama Evropske unije i osiguranje održivog finansiranja javnih programa kantona;

#### V. PRIORITETNI ZADACI

Prioritetni zadaci javne uprave u oblasti razvoja do 2014. godine:

- Povećanje broja zaposlenih i samozaposlenih, produktivnosti zaposlenih i poboljšanje uslova rada u kojima rade radnici;
- Razvoj metalne, auto, namjenske, prehrambene industrije i poljoprivrede, poduzetništva i obrta;
- unaprijeđenju cestovne, turističke, industrijske, stambene i kulturne infrastrukture;
- Provođenje reformi socijalnih, zdravstvenih i obrazovnih programa u cilju prilagođavanja kantonalnih programa potrebama građana i osiguranja kvalitetnih i troškovno efikasnih usluga;
- Osiguranje djelotvornije, efikasne i harmonizovane javne uprave i javnih službi, koja će građanima pružati kvalitetne usluge za manje novca i koja će poslovati na osnovu

transparentnih i otvorenih procedura po evropskim standardima;

- Osiguranje efikasnog utroška javnih sredstava u vršenju svoje nadležnosti i održivog sistema finansiranja javnih ustanova i preduzeća;

## VI. PRIORITETNE REFORME, PROGRAMI, PROJEKTI I MJERE

1.)

Prioritetne reforme su:

### 1. Reforma socijalne sigurnosti nezaposlenih

Provođenje reforme u sistemu socijalne sigurnosti nezaposlenih lica sa ciljem smanjenjem broja registriranih zaposlenih na broj lica koja aktivno traže zaposlenje ili su u procesu prekvalifikacije i obuke ukoliko njihova zanimanja nisu tražena na tržištu. Reforma će se zasnivati na principu da se za sve nezaposlene radnike koji su registrirani u Službi za zapošljavanje zbog ostvarivanja drugih prava, u slučaju skidanja sa evidencije osigura ostvarivanje ovih prava u skladu sa postojećim ili novim zakonskim rješenjima.

### 2. Reforma poljoprivrednog sektora

Provođenje reforme u poljoprivrednom sektoru u cilju stvaranja uslova za razvoj i zapošljavanje. Reforma će se zasnivati na promjeni sistema podsticaja poljoprivredne proizvodnje u skladu sa EU standardima, registraciji svih poljoprivrednih proizvođača, povećanju broja poljoprivrednih proizvođača i njihovom razvoju, te na jačanju instrumenata koji će omogućiti efikasniju ulogu kantona u razvoju ruralnih područja.

### 3. Reforma sistema socijalne zaštite

Reforma sistema socijalne zaštite ima za cilj unaprijeđenje sistema socijalne zaštite lica u stanju socijalne potrebe, porodilja, siromašnih porodica sa djecom, osoba sa onesposobljenjem i starijih ljudi.

### 4. Sveobuhvatna reforma javne uprave

Pokretanje programa povećanja efikasnosti javne uprave na području Bosansko-podrinjskog kantona, koji će se zasnivati na detaljnoj analizi

kapaciteta za donošenje odluka i koordinaciju javnih finansija, ljudskih potencijala, upravnih postupaka, institucionalnih komunikacija i nivoa korištenja informacionih tehnologija u javnoj upravi.

### 5. Reforma javnih finansija

Pokretanje programa reforme svih davanja iz budžeta kantona koji će se zasnivati na pravnoj i finansijskoj analizi svih zakonskih propisa koji predstavljaju osnov za izdvajanje sredstava iz budžeta kantona. Reforma će se zasnivati na jasnoj identifikaciji zakonskih obaveza preuzetih iz zakona Federacije BiH i zakona kantona, zakonskih namjene izdvajanja sredstava, podacima o trenutnom i potencijalnom broju korisnika prava, analizi ostvarenih rezultata koji se postižu i uticaja koji se ostvaruje.

### 6. Reforma poreza na imovinu

Provođenje reforme poreskih zakona u nadležnosti Bosansko-podrinjskog kantona i donošenje novog Zakona o porezu na imovinu. Reforma će se zasnivati na Evropskim standardima koji podstiču efikasno korištenje imovine i koji omogućavaju pravednost prema socijalno ranjivim kategorijama.

### 7. Reforma sistema stipendiranja

Provođenje reforme sistema stipendiranja učenika i studenata u cilju efikasnijeg odgovaranja na potrebe kantona za obrazovanim kadrovima. Reforma će se zasnivati na potrebi osiguranja podrške socijalno ranjivim kategorijama u pristupu obrazovanju i obezbjeđenju stručnih kadrova u partnerstvu sa javnim i privatnim sektorom u skladu sa razvojnim potrebama.

2.)

Prioritetni programi su:

### 1. Program podrške razvoju privatnog sektora

Program ima za cilj pružiti podršku razvoju poslovnog sektoru u realizaciji projekata koji omogućavaju povećanje broja zaposlenih, povećavanje prihoda zaposlenim radnicima, proširivanje obima poslovanja, uvođenje novih tehnologija, osiguranje pristupa novim tržištima, unaprijeđenje zaštite na radu i prava radnika iz

radnog odnosa, unaprijeđenje kvalitete proizvoda i usluga i razvoj menadžmenta.

## 2. Program podrške izvoznoj industriji

Program ima za cilj pružiti podršku srednjim i velikim preduzećima zainteresovanim za nova ulaganja na prostoru kantona koja omogućavaju zapošljavanje značajnog broja radnika, razvoj izvozno orjentisane ekonomije i efikasno korištenje privrednih resursa za ekonomski razvoj Bosansko-podrinjskog kantona.

## 3. Program razvoja turizma

Program ima za cilj pružanje podrške razvoju turističke infrastrukture u oblastima koje mogu utjecati na razvoj turizma kao važne privredne grane, kao i na ukupno poboljšanje kvalitete života na prostoru kantona.

## 4. Program ruralnog razvoja

Program ima za cilj pružiti posebnu podršku ruralnom razvoju koji će podržavati razvojne inicijative koje dolaze iz ruralnih zajednica i koji će obezbijediti podsticaj privatnom sektoru u otvaranju proizvodnih radnih mjesta u ruralnim područjima kantona.

## 5. Program podrške razvoju tržišta rada

Program ima za cilj osigurati podršku nezaposlenim u aktivnom učešću na tržištu rada kroz zapošljavanje i pronalaženju posla, razvoj kapaciteta nezaposlenih, njihovo informisanje o stanju na tržištu rada, edukaciju i obuku, osiguranje posebnih podsticaja za zapošljavanje ranjivih i teško upošljivih kategorija i osiguranje mogućnosti za sticanje znanja kroz volontiranje i rad na poslovima u zajednici.

## 6. Program podrške veteranima rata

Program ima za cilj osigurati posebnu podršku zapošljavanju i integraciji demobilisanih boraca u ekonomski život, posvećujući posebnu pažnju da porodice pripadnika Armije BiH imaju osiguran dostojanstven standard života.

## 7. Program podrške održivom povratku

Program ima za cilj osiguranje podrške raseljenim i povratnicima pomoć u osiguranju održivih ekonomskih i socijalnih uslova života u njihovim mjestima povratka.

## 8. Program podrške socijalnim kategorijama

Program ima za cilj pružanje dodatne socijalne, zdravstvene i stambene pomoći socijalno ranjivim kategorijama.

3.)

Prioritetni projekti:

### 1. Projekat fiskalnih podsticaja novom zapošljavanju.

Projekat će omogućiti fikalne podsticaje u nadležnosti kantona za nova zapošljavanja. Projekat će dodatno podsticati zapošljavanje nezaposlenih demobilisanih boraca, lica u stanju socijalne potrebe i druge teško upošljive kategorije.

### 2. Projekat razvoja poslovne infrastrukture I.

Projekat će obezbijediti finansijsku podršku u aktivnostima na izgradnji trgovinsko -poslovnog središta u cilju unaprijeđenja poslovne, komercijalne i turističke infrastrukture u Goraždu.

### 3. Projekat razvoja poslovne infrastrukture II.

Projekat će obezbijediti razvoj industrijskih zona i revitalizaciju sive privredne infrastrukture koja se nalazi u vlasništvu kantona i njeno efikasno korištenje kao važnog resursa ukupnog razvoja kantona.

Bosansko-podrinjski kanton Goražde će učestvovati u realizaciji uređenja poslovnih industrijskih zona koje su trend razvoja u smislu razvojne politike Bosne i Hercegovine u cjelini.

### 4. Projekat razvoja planinskog turizma.

Projekat će obuhvatiti tri najatraktivnije turističke lokacije na području kantona sa ciljem unaprijeđenja turističke infrastrukture i turističke ponude za zimski turizam.

### 5. Projekat razvoja ljetnog turizma.

Projekat će obuhvatiti izradu arhitektonsko-ekološko-turističkih rješenja i ulaganja u uređenje plaža u gradu Goraždu i drugim atraktivnim plažama na Drini u cilju razvoja turizma, povećanju turističke atraktivnosti Goražda i održivog korištenja rijeke Drine u turističke svrhe.

**6. Projekat modernizacije saobraćajne infrastrukture.**

Projekat će omogućiti definisanje strateških prioriteta za razvoj saobraćajne infrastrukture i rekonstrukciju postojeće saobraćajne infrastrukture po prioritetima u odnosu na intenzitet korištenja sa ciljem osiguranja kvalitetnih infrastrukturnih preduslova za razvoj ekonomije.

**7. Projekti rekonstrukcije ključnih putnih pravaca**

Projekat će uključivati aktivnosti na rekonstrukciji Regionalnih cesta Goražde – Prača i Goražde – Čajniče, izrada potrebnih studija za proglašenje regionalnog puta entitetska granica RS-Jošanica u Općini Foča-Cvilin-Osanica-Sadba-Ahmovići-Zupčići i započeti aktivnosti na izgradnji pomenutog pravca i puteva Mravinjac – Berič i Osanica - Ilovača.

Izgradnja savremenog mosta preko rijeke Drine u Mjesnoj zajednici Vitkovići.

**8. Projekat modernizacije osnovnih i srednjih škola.**

Projekat će obuhvatiti osavremenjavanje uslova u kojima se izvodi nastava i u kojima borave učenici u cilju poboljšanja uslova obrazovanja na prostoru Bosansko-podrinjskog kantona.

**9. Projekat osiguranja prostornih kapaciteta Kantonalne bolnice Goražde.**

Projekat će osigurati potrebne uslove za rad Kantonalne bolnice kroz osiguranje prostornih kapaciteta, nabavku savremene medicinske opreme sa ciljem održivog pružanja kvalitetnih zdravstvenih usluga na prostoru kantona.

**10. Projekat socijalnog stanovanja.**

Projekat će uspostaviti mehanizam za obezbjeđenje adekvatnih uslova za stanovanje socijalno ranjivim kategorijama kroz korištenje vlastitih stambenih resursa i zakup nekorištenih stambenih jedinica u vlasništvu građana.

**11. Projekat reorganizacije sistema institucionalne brige za stare osobe.**

Projekat će osigurati unaprijeđenje sistema institucionalne brige za stare osobe sa kvalitetnim socijalnim i zdravstvenim uslugama koje se pružaju starim osobama.

**12. Projekat energetske efikasnosti**

Projekat će osigurati podršku u osiguranje energestski efikasnog sistema grijanja, kroz investicije u toplotnu izolaciju (termo fasade) na zgradama koji će se sufinansirati zajedno sa građanima u skladu sa odredbama ovog Programa.

**13. Projekat jačanja kulture I.**

Projekat će osigurati podrške institucionalnom jačanju Međunarodnog festivala prijateljstva kroz ulaganje u opremu i promociju Festivala u Bosni i Hercegovini i susjednim državama.

**14. Projekat jačanja javnih preduzeća I.**

Projekat će definisati dugoročno rješenje za smještaj Kantonalne televizije koji će omogućiti obezbjeđenje odgovarajućeg prostora za smještaj televizije, opremanje studijskog prostora, nabavku opreme i poboljšanje uslova novinara u cilju poboljšanja pozicije televizije na medijskom tržištu.

**15. Projekat jačanja kulture II.**

Projekat revitalizacije gradskog kina koji će uključivati investicije u rekonstrukciju i nabavku savremene opreme za reprodukciju filmova sa 3D tehnologijom i uspostavljanje saradnje sa osnovnim i srednjim školama u cilju korištenja raspoložive tehnologije u obrazovne svrhe.

**16. Projekat jačanja kulture III.**

Projekat izgradnje muzeja na području općine Goražde.

**17. Projekat rekonstrukcije Gradskog trga sa spomenikom braniocima Goražda.**

Projekat izrade novog arhitektonskog rješenja Gradskog trga sa spomenikom braniocima i njegove izgradnje.

**18. Projekat razvoja komunalne arhitekture I**

Projekat ima za cilj da u saradnji sa općinom Goražde definiše urbanističko rješenje Podhranjenskog potoka od Gradske galerije

(Privredne banke) do hotela Behar i osigura sredstva za njegovu realizaciju.

#### **19. Projekat urbanizacije naselja Vitkovići**

Projekat urbanističkog rješenja i rekonstrukcije javnih površina u naselju Vitkovići.

#### **20. Projekat efikasne uprave I.**

Projekat unaprijeđenja performansi javne uprave koji će smanjiti bespotrebne aktivnosti koje ne daju nikakvu dodatnu vrijednosti i koje stvaraju nepotrebne troškove u funkcionisanju javne uprave.

#### **21. Projekat efikasne uprave II.**

Projekat uspostavljanja e-vlade omogućit će primjenu informacionih tehnologija u različitim segmentima javne uprave koji će obezbijediti bolje javne usluge, efikasniju koordinaciju vladinih aktivnosti, olakšan pristup uslugama od strane građana, veću transparentnost u radu i bolju interakciju sa korisnicima usluga, građanima, civilnim društvom i privatnim sektorom.

#### **22. Projekat Razvoja sporta I**

Projekat ima za cilj unaprijediti uslove za bavljenje sportskim aktivnostima i podršku sportskim klubovima u omogućavanju kvalitetnih uslova za bavljenjem sportom u saradnji sa profesorima sporta zaposlenim u obrazovnim institucijama.

#### **23. Projekat multimedijalnog centra za mlade**

Projekat ima za cilj da u okviru Centra za kulturu uspostavi nezavistan centar za mlade koji će raspolagati adekvatnim prostorom i opremom koja će biti nabavljena kroz projekat i u okviru kojeg će se uspostaviti saradnja sa drugim aktivnostima centra, posebno u organizaciji Festivala prijateljstva.

#### **24. Projekat razvoja komunalne infrastrukture II**

Projekat ima za cilj da pruži podršku općini Goražde u cilju izgradnje kolektora i rekonstrukcije sekundarne vodovodne mreže.

4.)

#### **1. Podrška javnim ustanovama I.**

Jačanje kapaciteta javnih ustanova koje obavljaju društvenu djelatnost, kroz sanacione planove u kojima će se obezbijediti sredstva za saniranje višegodišnjih finansijskih gubitaka u poslovanju i kroz provođenje reorganizacije djelatnosti u cilju obezbjeđivanja održivog pružanja kvalitetnih javnih usluga.

#### **2. Podrška zaštiti i razvoju radničkih prava I.**

Osiguranje punog poštivanja prava radnika kroz aktivnosti koje će omogućiti zaštitu socijalnih prava zaposlenih radnika, unaprijeđenja radničkih prava i uslova rada na prostoru Bosansko-podrinjskog kantona;

#### **3. Podrška zaštiti i razvoju radničkih prava II.**

Osiguranje punog poštivanja socijalnih prava radnika, posebno žena za vrijeme porodiljskog odsustva.

#### **4. Podrška razvoju ljudskih resursa u zdravstvu I.**

Obezbeđenje kvalitetnih ljudskih resursa neophodnih za razvoj zdravstvenog sektora u Bosansko-podrinjskom kantonu.

#### **5. Podrška razvoju javnog zdravstva I.**

Obezbeđenje neophodnih resursa za razvoj javno-zdravstvene djelatnosti u oblasti prevencije, zdravstvene zaštite stanovništva, zaštite vode i namirnica za opštu upotrebu.

#### **6. Podrška razvoju mehanizama za programsko planiranje**

Uspostavljanje jedinstvene metodologije programskog planiranja, implementacije, monitoringa, evaluacije i izvještavanja u skladu sa EU standardima, čije će poštivanje biti obavezno od strane svih korisnika budžetskih sredstava i koja će se primjenjivati na sva izdvajanja na tranfere i kapitalna ulaganja u iznosima većim od 10.000 KM.

#### **7. Podrška suzbijanju korupcije**

Poduzimanje konkretnih mjera na povećanju transparentnosti u radu i na suzbijanju korupcije unutar državnih institucija u oblastima povezanim sa javnim nabavkama i sa poslovanjem u

Prioritetne mjere:

sektorima javne uprave, zdravstva, obrazovanja i zapošljavanja.

#### **8. Unaprijeđenje rada javnog sektora I.**

Osiguranje povećanja kvalitete i efikasnosti u radu javnih službi kroz otklanjanje regulatornih, organizacionih i tehničkih barijera u radu angažovanjem Uprave za inspeksijske poslove koja će provesti detaljan inspeksijski nadzor nad svim javnim ustanovama i preduzećima u vlasništvu Bosansko-podrinjskog kantona nakon čega će za Vladu Bosansko-podrinjskog kantona u saradnji sa resornim ministarstvima izraditi prijedlog za unaprijeđenje rada, poboljšanje kvalitete usluga i osiguranje veće troškovne efikasnosti u radu javnih ustanova.

#### **9. Provođenje nezavisne revizije finansijskog poslovanja**

Provođenje nezavisne vanjske revizije poslovanja svih javnih ustanova i javnih preduzeća osnovanih od strane kantona za 2009. i 2010. godinu;

#### **10. Smanjenje sive ekonomije**

Osiguranje punog poštivanja regulatornih odredbi od strane privatnog sektora, posebno u oblasti radnog prava, fiskalnih obaveza i zaštite potrošača.

5.)

Javna uprava kantona u partnerstvu sa javnim, privatnim i civilnim sektorom će započeti izradu slijedećih studija opravdanosti:

##### **1. Elaborat o toplifikaciji**

Elaborat ima zadatak utvrđivanja opravdanosti ulaganja u integralno rješavanje pitanja grijanja kroz projekte toplifikacije, poboljšanje toplotne izolacije stambenih jedinica i uspostavljanje troškovno efikasnog sistema grijanja javne uprave i javnih ustanova.

##### **2. Elaborat o razvoju prerade mlijeka**

Elaborat ima zadatak utvrđivanja opravdanosti ulaganja u izgradnju kapaciteta za proizvodnju mliječnih proizvoda u partnerstvu sa privatnim sektorom.

##### **3. Elaborat o prevozu učenika i studenata**

Elaborat ima zadatak utvrđivanja opravdanosti obezbjeđenja jedinstvenog i efikasnog sistema prevoza i smještaja učenika i studenata na prostoru kantona.

##### **4. Elaborat o pokretanju univerziteta**

Elaborat ima zadatak utvrđivanja opravdanosti ulaganja u razvoj obrazovnih mogućnosti kantona kao motora ukupnog razvoja kroz formiranje Univerziteta u skladu sa Zakonom i potrebama razvojnih grana privrede;

##### **5. Elaborat o reorganizaciji primarne zdravstvene zaštite**

Elaborat ima zadatak utvrđivanja opravdanosti provođenja reorganizacije sistema primarne zdravstvene zaštite u cilju poboljšanja dostupnosti zdravstvenih usluga, efikasnijeg korištenja resursa i boljeg upravljanja u zdravstvu;

##### **6. Elaborat o izgradnji sportskog bazena**

Elaborat ima zadatak utvrđivanja opravdanosti ulaganja u izgradnju savremenog centra sa bazenom i uslugama u partnerstvu sa privatnim sektorom koje bi mogle unaprijediti kvalitetu sportskog života građana, ali i osnažiti turističku ponudu sa kvalitetnim vodenim sadržajem;

##### **7. Elaborat o izgradnji turističke infrastrukture**

Elaborat ima zadatak utvrđivanja opravdanosti ulaganja u izgradnju turističke infrastrukture u partnerstvu sa privatnim sektorom na dijelu jezera u općini Goražde, vezane za jezerski i nautički turizam.

6.)

U cilju provođenja planiranih prioriternih reformi Vlada Bosansko-podrinjskog kantona Goražde će formirati interresorne radne grupe za pripremu, provođenje i nadgledanje implementacije reformi.

Provođenje prioriternih reformi će se zasnivati na usvojenim strategijama na nivou Bosne i Hercegovine, Federacije BiH i u skladu sa odredbama ovog Programa.

7.)



U aktivnostima na implementaciji prioriternih programa ravnopravno u skladu sa svojim kapacitetima, samostalno ili u partnerstvu, može učestvovati privatni i civilni sektor kroz provođenje vlastitih projekata u skladu sa kriterijima programa.

Odabrani projekti privatnog i civilnog sektora koji ispunjavaju kriterije prioriternih programa će biti finansirati iz budžeta Bosansko-podrinjskog kantona.

8.)

Vlada Bosansko-podrinjskog kantona će odrediti nosioce implementacije prioriternih projekata.

U skladu sa kriterijima koje će donijeti vlada, implementacija prioriternih projekata može se povjeriti privatnom i civilnom sektoru.

9.)

Vlada Bosansko-podrinjskog kantona će obezbjediti uslove za kandidovanje i drugih projekata od strane općina u sastavu kantona, javnih ustanova i preduzeća, privatnog i civilnog sektora u skladu sa odredbama ovog programa u sektorima obrazovanja, zdravlja, vodosnabdjevanja i komunalija, javne administracije i civilnog društva, socijalne infrastrukture i usluga, poljoprivrede, turizma, zaštite okoliša, urbanog razvoja i ruralnog razvoja.

## VII. IMPLEMENTACIJA

1.)

U cilju efikasne implementacije Programa razvoja, u oblasti implementacije Programa definisani su:

1. Učesnici u implementaciji Programa,
2. Način izrade Akcionog plana implementacije Razvojnog programa.

2.)

Nadležnost za učestvovanje u implementaciji programa razvoja imaju:

- Skupština Bosansko-podrinjskog kantona,
- Zajednički skupštinski odbor,
- Vlada Bosansko-podrinjskog kantona,

- Javne ustanove i javna preduzeća osnovana od strane kantona ili koje se većinski finansiraju iz izvora koji su u nadležnosti kantona.

3.)

Zajednički skupštinski odbor čine članovi Komisije za privredu i ekonomsku politiku i Komisije za rad, zdravstvo i socijalnu zaštitu, te po 1(jedan) član iz ostalih stalnih radnih tijela Skupštine.

4.)

U implementaciji Programa razvoja u skladu sa Zakonom o lokalnoj samoupravi i kriterijima za uključivanje ne-državnih aktera, dobrovoljno učestvuju:

1. Općinska administracija,
2. Javna komunalna preduzeća i općinske javne ustanove,
3. Privatni sektor,
4. Organizacije civilnog društva,
5. Mjesne zajednice,
6. Građani Bosansko-podrinjskog kantona.

Uključivanje ne-državnih aktera kao učesnika u procesu implementacije i/ili korisnika Programa će se određivati na osnovu njihovog:

1. Položaja u određenom sektoru,
2. Interesa za razvoj u skladu sa Programom,
3. Kapaciteta za učestvovanje u implementaciji kao nosioca aktivnosti ili partnera,
4. Ljudskih, organizacijskih i finansijskih kapaciteta,
5. Mogućeg doprinosa u ostvarivanju očekivanih rezultata Programa.

5.)

Nadležnost Skupštine Bosansko-podrinjskog kantona u implementaciji programa je da:

- Donosi izmjene i dopune Programa razvoja,
- Donosi Akciononi plan implementacije Programa razvoja,
- Usvaja polugodišnji i godišnji Izvještaj o napretku Programa razvoja, koji sadrži izvještaj o implementaciji Programa u skladu sa Akcionim

planom, Finansijski izvještaj i Izvještaj o provedenom monitoringu i evaluaciji,

- Provodi raspravu o implementaciji Programa razvoja na osnovu prijedloga ili zahtjeva Zajedničkog odbora.

6.)

Nadležnosti zajedničkog skupštinskog odbora su:

- Davanje Mišljenja na polugodišnje i godišnje izvještaje o napretku,
- Prati napredak u implementaciji Razvojnog programa i u skladu sa potrebom usmeno i pismeno informiše Skupštinu,
- Inicira i daje prijedloge Skupštini za promjene i usklađivanje Programa razvoja,
- Prati implementaciju zakona, strategija, odluka i zaključaka Skupštine u vezi Programa razvoja,
- Razmatra prijedloge, sugestije i kritike civilnog društva i građana,

7.)

Vlada Bosansko-podrinjskog kantona je nadležna za:

- Predlaganje donošenja propisa iz nadležnosti Skupštine u skladu sa odredbama ovog Programa,
- Predlaganje budžeta kantona i instrumenata za njegovo izvršavanje u skladu sa odredbama Programa razvoja,
- Upravljanje procesom implementacije Programa razvoja i donošenje odluka o nosiocima aktivnosti na implementaciji pojedinih komponenti Programa,
- Izradu Prijedloga Akcionog plana za implementaciju Programa razvoja i definisanje godišnjih prioriteta, očekivanih rezultata i potrebnih resursa,
- Donošenje izvršnih odluka u implementaciji Programa razvoja,
- Utvrđivanje nadležnosti organa uprave, javnih ustanova i javnih preduzeća u implementaciji Programa razvoja.

8.)

Akcioni plan implementacije sadrži hijerarhijski pregled zadataka, aktivnosti, nadležnosti odgovornih strana, informacije o vremenskom okviru implementacije, pregled resursa uključujući neophodne finansije, te informacije o očekivanom uticaju i ključnim očekivanim rezultatima pojedinačnih aktivnosti koje se provode u implementaciji Razvojnog plana.

Akcioni plan sadrži informacije o svim programima, projektima i mjerama koje su identifikovane kao prioritetne za tekuću godinu implementacije Razvojnog programa u kojem se obavezno nalaze slijedeće informacije:

- Naziv reforme, programa, projekta aktivnosti i mjere (aktivnost),
- Kratak opis reforme, programa, projekta aktivnosti i mjere,
- Procjenjeni ukupni troškovi implementacije akcije u KM,
- Izvori sredstava za finansiranje reforme, programa, projekta aktivnosti i mjere (budžet kantona, ostali javni izvori i prihodi po osnovu učešća ne-državnih aktera, prihodi po osnovu donacije i drugo),
- Naziv nosioca aktivnosti, ime odgovorne osobe i nadležnosti nosioca aktivnosti,
- Naziv partnera i drugih učesnika u implementaciji,
- Vrijeme trajanja implementacije u mjesecima,
- Planirani početak i završetak implementacije pojedinačnih aktivnosti,
- Informacije o strateškom i specifičnom cilju čijem ostvarivanju će doprinijeti planirana aktivnost u skladu sa programom,
- Ciljana grupa ili grupe koje će imati direktne koristi od implementirane aktivnosti,
- Očekivani ključni efekti ili rezultati nakon završetka planirane akcije.

9.)

Svaka prioritetna reforma, program i projekat koji je predviđen Programom razvoja čija implementacija je predviđena Akcionim planom (akcija), biće detaljno

pripremljena, na način da sadrži osnovne informacije o:

- Načinu doprinosa akcije implementaciji specifičnih i strateških ciljeva iz Razvojnog programa;
- Identifikovanim kritičnim pitanjima i analizi stanja relevantnih područja, tema ili pitanja i uticaj na ciljane grupe;
- Provedenom procesu prioritizacije svih ključnih aktivnosti u okviru akcije;
- Definisanim ciljevima u skladu sa Programom razvoja i specifičnim zadacima akcije;
- Listi specifičnih aktivnosti koje će se provesti u toku implementacije akcije,
- Neophodnim resursima za implementaciju akcije u novcu i sredstvima, ljudskim i kadrovskim resursima, te drugim neophodnim resursima kao što su zgrade ili zemljište koji su neophodni.
- Opis direktnih rezultata koji će provođenjem akcije biti postignuti,
- Opis dugoročnih rezultata, odnosno efekata i utjecaja akcije na ciljeve i zadatke Programa razvoja,
- Menadžmentu akcije, definisanju odgovornosti za implementaciju akcije i načinu ostvarivanja saradnje sa partnerima i korisnicima.

10.)

Za osiguranje uspješne implementacije, Vlada Bosansko-podrinjskog kantona će prilikom izrade godišnjeg plana rada i prijedloga Budžeta Bosansko-podrinjskog kantona usaglasiti prioritete na provođenju kantonalne politike sa prioritetima Programa razvoja.

11.)

Resorna ministarstva, javne ustanove i institucije u nadležnosti kantona će prilikom izrade programa rada za 2011. godinu uvrstiti relevantne ciljeve i zadatke iz Programa razvoja, što je obavezno za ministarstva i organe koji su direktno nadležni za poslove koji su predviđeni ovim programom.

12.)

Ministarstvo za privredu će za potrebe implementaciju Programa razvoja posebnu pažnju dati svojim nadležnostima iz oblasti:

- unapređenja proizvodnje,
- korištenja prirodnih bogatstava,
- razvoja poljoprivrede,
- korištenja voda u energetske i rekreativne svrhe,
- pokrenuti pitanje stavljanja u funkciju javnog vodnog dobra u vlasništvu Federacije BiH u priobalju rijeke Drine, kao vodotoka prve kategorije,
- osiguravanja uslova za razvoj tržišnih i ekonomskih odnosa,
- kontrole cijena proizvoda i usluga,
- politike turizama, razvoja turističkih resursa i turističko-promotivne djelatnosti,
- kreiranje politike i razvoja rekreativnih, rehabilitacionih i drugih centara,
- regulisanja i obezbjeđivanja prometa, komunikacija i transportne infrastrukture,
- obezbjeđivanja uslova za razvoj javnog prometa i sistema komunikacijskih veza na nivou Kantona,
- utvrđivanje programa i obezbjeđivanje uslova za izgradnju, obnovu i održavanje kantonalnih saobraćajnica,
- poduzetništva,

13.)

Ministarstvo za pravosuđe, upravu i radno odnose će za potrebe implementacije Programa razvoja posebnu pažnju dati svojim nadležnostima iz oblasti:

- organizacije i načina rada organa uprave i unapređenje rada u organizaciji organa uprave,
- stručnog obrazovanja i usavršavanja službenika u kantonalnim ministarstvima i drugim tijelima uprave,
- pripremanje nacrti zakona i drugih propisa kojima se uređuje sistem uprave,
- provođenja politike zapošljavanja na području Kantona,
- regulisanja uvjeta zaštite na radu,

- radnih odnosa i prava iz radnih odnosa,

14.)

Ministarstvo za socijalnu politiku, zdravstvo, raseljena lica i izbjeglice će za potrebe implementacije Programa razvoja posebnu pažnju dati svojim nadležnostima iz oblasti:

- regulisanja funkcionisanja i razvoja sistema socijalne zaštite,
- ostvarivanja prava na socijalnu zaštitu i socijalnu sigurnost,
- utvrđivanja prava na subvencioniranje troškova socijalne zaštite,
- uspostavu i funkcionisanje sistema dječije zaštite,
- utvrđivanje uslova, mjerila i kriterija za ostvarivanje prava starih i iznemoglih lica u objektima socijalne zaštite za stare i iznemogle,
- provođenja politike zdravstvene zaštite stanovništva na području Kantona,
- stvaranja uslova za rad sekundarne zdravstvene zaštite stanovništva,
- osiguravanja primarne i preventivne zdravstvene zaštite i praćenje zdravstvenog stanja stanovništva,
- preduzimanje mjera za povratak, i koordinaciju programa pomoći za raseljena lica i izbjeglice,
- nadzor nad radom javnih stanova iz oblasti zdravstva, socijalne i dječije zaštite.

15.)

Ministarstvo za boračka pitanja će za potrebe implementacije Programa razvoja posebnu pažnju dati svojim nadležnostima iz oblasti:

- utvrđivanja prava boraca i članova njihovih porodica na području Kantona;
- utvrđivanja politike i donošenje propisa Kantona kojima se definišu uslovi za ostvarivanje prava boraca, ratnih vojnih invalida i članova porodica šehida i poginulih boraca;
- zaštite ratnih i mirnodopskih vojnih invalida, članova porodica šehida, poginulih, nestalih i umrlih boraca, kao i umrlih ratnih i mirnodopskih vojnih invalida;

- izgradnje, uređenja i održavanja spomen obilježja i mezarja boraca;

- suradnje i koordinacije rada sa kantonalnim Ministarstvom zdravlja i drugim ministarstvima u vršenju poslova iz svoje nadležnosti;
- osiguranje sredstava i drugih oblika pomoći borcima;
- koordinaciju djelovanja (udruženja porodica šehida, ratnih vojnih invalida i demobilisanih boraca).

16.)

Ministarstvo za obrazovanje, nauku, kulturu i sport će za potrebe implementacije Programa razvoja posebnu pažnju dati svojim nadležnostima iz oblasti:

- obezbjeđenje uslova za obrazovanje,
- obezbjeđenja uslova za smještaj učenika i studenata,
- utvrđivanja pedagoškog standarda i normativa prostora, opreme i nastavnih sredstava za predškolsko, osnovno i srednje obrazovanje i odgoj i visoko obrazovanje,
- utvrđivanja nastavnog plana i programa za osnovno i srednje obrazovanje i odgoj i donošenje nastavnih planova i programa univerzitetskih ustanova,
- provođenja politike u oblasti tehničke kulture i inovatorstva,
- razvoja sistema informisanja u Kantonu,
- funkcionisanja javnih preduzeća u oblasti informisanja čiji je osnivač Kanton,
- provođenja politike razvoja kulture i kulturnih djelatnosti,
- regulisanje i obezbjeđenje uslova za zaštitu, revitalizaciju i restauraciju kulturno-historijskog i graditeljskog naslijeđa na području Kantona,
- predlaganje i provođenje politike u oblasti tjelesne kulture, sporta, odmora i rekreacije.

17.)

Ministarstvo za urbanizam, prostorno uređenje i zaštitu okoliša će za potrebe implementacije

- Programa razvoja posebnu pažnju dati svojim nadležnostima iz oblasti:
- izgradnje i uređenja zemljišta na kantonalnom nivou,
  - pripremanja progama za donošenje prostorne i urbanističke dokumentacije,
  - osiguranja prostornog planiranja i urbanističkog uređenja pripremanjem razvojnih planova (prostorni plan urbanistički plan, urbanistički red), kao i provedbenih planova (regulacioni plan, urbanistički projekat) i druge planske dokumentacije i programe za njihovo provođenje,
  - uređenja i korištenja kantonalnog građevinskog zemljišta,
  - zaštite kulturno-historijskog i privrednog naslijeđa na kantonalnom nivou,
  - provođenja stambene problematike, uključujući i regulisanje i obezbjeđenje stanovanja,
  - organizovanje održavanja stambenih zgrada i stanova na kojima postoji pravo vlasništva Kantona,
  - održavanje i izgradnju stambenih objekata,
  - regulisanje i obezbjeđenje uslova za sanaciju i obnovu porušenih i oštećenih stambenih objekata i stanova,
  - koordiniranje rada sa resornim ministarstvima u Vladi kantona na izradi i utvrđivanju koncepta i programa obnove i razvoja,
  - koordinacije i pomoći općinama u izradi programa obnove i razvoja,
  - provođenja politike koja se tiče regulisanja očuvanja i unapređenja okoline,
  - obezbjeđivanja dobara u općoj upotrebi, dobara od općeg interesa (rekreativni, turistički i sportski centri, parkovi),
  - ekologije (zaštitu okoline-vazduha, tla, vode, zaštite od buke, urbanog zelenila, šuma),
  - provođenja politike koja se tiče regulisanja i zadovoljavanja komunalnih potreba građana i javnih službi,
- utvrđivanje programa i obezbjeđivanje uslova za izgradnju, rekonstrukciju, održavanje i funkcionisanje objekata zajedničke komunalne potrošnje u okviru javnih preduzeća,
  - zadovoljavanja komunalnih potreba-programiranje izgradnje i funkcionisanje komunalne infrastrukture (vodovod, kanalizacija, distribucija električne energije, komunalna higijena, parkovi i zelene površine, tržnice i pijace, gradska groblja, sanitarne deponije i dr.) od primarnog značaja za Kanton,
  - nadzor nad radom komunalnih preduzeća,
- 18.)
- U aktivnostima na implementaciji ovog programa vlada će biti potpuno otvorena za saradnju sa svim organizacijama civilnog društva koje će ravnopravno, u skladu sa svojim tehničkim mogućnostima, moći aktivno učestvovati u implementaciji predviđenih programa i projekata, odnosno koje će biti u mogućnosti predlagati i nove projekte koji na efikasan način mogu doprinijeti ostvarivanju ciljeva ovog programa.
- ## VIII. FINANSIRANJE PROGRAMA RAZVOJA
- 1.)
- Izvori sredstava za finansiranje reformi, programa, projekata, aktivnosti i mjera koje su predviđene razvojnim planom su:
1. Budžet Bosansko-podrinjskog kantona za 2011., 2012., 2013. i 2014. godinu,
  2. Budžeti općina u sastavu Bosansko-podrinjskog kantona Goražde,
  3. Vanbudžetski fonodvi u nadležnosti Bosansko-podrinjskog kantona Goražde,
  4. Sredstva prikupljena na osnovu privatno-javnog partnerstva,
  5. Sredstva direktnih korisnika u skladu sa odredbama Programa razvoja,
  6. Grantovi Federacije BiH za razvojne projekte i grantovi drugih donatora,
  7. Kreditna sredstva.

2.)

Sredstva za implementaciju Programa razvoja do 2014. godine iz budžeta kantona će iznositi minimalno 50 miliona KM.

Ukupna sredstva za implementaciju Programa razvoja, koja će uključivati dodatna sredstva iz drugih izvora i kreditna sredstva bit će definisana od strane Vlade Bosansko-podrinjskog kantona Akcionim planom.

3.)

Sredstva iz budžeta Bosansko-podrinjskog kantona za 2011., 2012., 2013. 2014. godinu će se obezbijediti:

- Preraspodjelom sredstava Ministarstva privrede, Ministarstva socijalne politike, zdravstva, raseljenih lica i izbjeglica i Ministarstva za boračka pitanja iz kategorije tekući transferi,
- Ostvarenim uštedama u ostalim programima koji se finansiraju iz budžeta kantona ili ostvarenim prihodima po osnovu grantova viših nivoa vlasti ili drugih donacija.

Preraspodjelom sredstava resornih ministarstava će se obezbijediti maksimalno 60 procenata sredstava potrebnih za implementaciju Programa razvoja.

Ostvarenim uštedama, grantovima ili donacijama će se obezbijediti minimalno 40 procenata sredstava potrebnih za implementaciju Programa razvoja.

4.)

U Budžetu Bosansko-podrinjskog kantona za 2011. godinu će se obezbijediti minimalno 5 miliona KM za implementaciju Programa razvoja.

Svake naredne godine izdvajanja za finansiranje Programa razvoja iz budžeta Bosansko-podrinjskog kantona Goražde će rasti u skladu sa Finansijskim planom programa razvoja do 2014. godine.

Za osiguranje sredstava za finansiranje Razvojnog programa, Vlada Bosansko-podrinjskog kantona će iskoristiti sve raspoložive finansijske mogućnosti.

5.)

Sredstva iz budžeta općina u sastavu Bosansko-podrinjskog kantona Goražde će se obezbijediti u skladu sa usvojenim Lokalnim ekonomskim planom u kojem će se definisati prioritetni projekti za lokalni

razvoj općina za čije sufinansiranje se planiraju sredstva iz budžeta Bosansko-podrinjskog kantona.

Izdvajanjem sredstava koja će se obezbjeđivati iz Budžeta Bosansko-podrinjskog kantona Goražde kao i sredstva koja će izdvajati iz Budžeta Općina Bosansko-podrinjskog kantona Goražde a prilikom realizacije razvojnih projekata planiranih u ovom programu ne smiju ugroziti niti može doći u pitanje funkcionisanje lokalnih zajednica u sastavu Bosansko-podrinjskog kantona Goražde.

6.)

Sredstva iz vanbudžetskih fondova će se obezbijediti iz sredstava Kantonalnog zavoda zdravstvenog osiguranja i Kantonalne službe za zapošljavanje, na način da će se prilikom usvajanja Programa rada i Finansijskog plana prioriteta utvrđivati u skladu sa Zakonom i u skladu sa odredbama Programa razvoja.

7.)

Sredstva po osnovu privatno-javnog partnerstva će se obezbijediti na način da će u implementaciji predviđenih projekata privatno-javnog partnerstva veći dio sredstava neophodnih za implementaciju biti obezbjeđen iz privatnih izvora dok će manji dio sredstava biti obezbjeđen iz budžeta kantona ili budžeta drugih nivoa vlasti.

Sredstva po osnovu direktnog učešća korisnika će se obezbijediti na način da će u implementaciji svih predviđenih projekata učešće u finansiranju osigurati i direktni korisnici projekta, izuzev za projekte čiji su direktni korisnici socijalno ranjive kategorije koje nemaju mogućnosti za osiguranjem vlastitog učešća.

Pod direktnim učešćem podrazumjeva se učešće u radu, stvarima, pravima i novcu, s tim da je učešće direktnih korisnika u novcu obavezno, a u stvarima, pravima i radu dobrovoljno.

8.)

Sredstva po osnovu grantova Federacije BiH za razvojne projekte i grantovi drugih donatora će se obezbijediti na osnovu finansiranja i sufinansiranja programa i projekata predviđenih Programom razvoja iz tih izvora.

9.)

Kreditna sredstva će se koristiti za finansiranje programa i projekata iz Plana razvoja za čije finansiranje je dobivena prethodna saglasnost Skupštine Bosansko-podrinjskog kantona da se kao izvori sredstava mogu koristiti kreditna sredstva u skladu sa Zakonom.

## IX. OČEKIVANI REZULTATI

Ključni očekivani rezultati Programa razvoja Bosansko-podrinjskog kantona su:

- Povećanje broja registriranih zaposlenih, posebno u prerađivačkoj industriji, poljoprivredi i turizmu;
- Povećanje obima industrijske proizvodnje;
- Povećanje izvoza;
- Povećanje broja dolaska turista;
- Značajno smanjenje broja registriranih nezaposlenih;
- Povećanje stepena ekonomske aktivnosti stanovništva;
- Povećanje prosječnih plaća u privatnom sektoru;
- Osigurano prepoznatljivo poštivanje prava radnika;
- Povećanje broja zaposlenih žena;
- Uspostavljena efikasna, funkcionalna i transparentna javna uprava u kantonu koja ima obezbjeđene resurse neophodne za pružanja usluga iz svoje nadležnosti i provedene reforme koje osiguravaju efikasno funkcionisanje ekonomskih i socijalnih zakona i programa;
- Osiguranje zaštite prava najranjivijim kategorijama.
- Osigurano značajno poboljšanje kulturnog života;
- Prioritetne reforme, programi, projekti i mjere predviđene Programom uspješno provedene.

## X. MONITORING I EVALUACIJA

1.)

Vlada Bosansko-podrinjskog kantona će uspostaviti sistem Monitoringa i Evaluacije (M&E) Programa razvoja za otkrivanje eventualnih nedostataka u

procesu implementacije i za poduzmanje aktivnosti za njihovo ispravljanje.

2.)

Provođenje monitoringa će se vršiti redovno, kroz sistematično prikupljanje i analizu informacija neophodnih za praćenje napretka implementacije Programa.

3.)

Ciljevi monitoringa su:

1. Osiguranje da se sve aktivnosti provode pravilno i na vrijeme,
2. Utvrđivanje da li se uloženi resursi pravilno koriste,
3. Identifikovanje problema u procesu implementacije Programa i predlaganje rješenja.

4.)

Na osnovu rezultata evaluacije Vlada Bosansko-podrinjskog kantona može odrediti da li je potrebno napraviti promjenu Razvojnog plana ili načinu njegove implementacije.

5.)

Na osnovu rezultata evaluacije obezbjeđiću se informacije o tome:

- Da li se rezultati ostvaruju prema planu i da li su relevantni za rješavanje problema,
- Da li ostvareni rezultati daju efektivan doprinos ostvarivanju ciljeva Razvojnog programa,
- Da li se planirani resursi obezbjeđuju na vrijeme i u skladu sa Akcionim planom.

6.)

Prilikom definisanja indikatora u Akcionom planu koristit će se objektivno provjerljivi indikatori koji će omogućiti opisivanje rezultata monitoringa i evaluacije na mjerljiv način.

7.)

Vlada Bosansko-podrinjskog kantona donosi odluku o aktivnostima na provođenju monitoringa i evaluacije o čemu najmanje polugodišnje obavještava Zajednički odbor dostavljanjem Evaluacijskog izvještaja.

8.)

Vlada uz Mišljenje Zajedničkog odbora dostavlja Skupštini Bosansko-podrinjskog kantona godišnji Izvještaj o napretku implementacije Razvojnog plana u skladu sa rezultatima monitoringa i evaluacije koji će sadržavati informacije o relevantnosti, efektivnosti, efikasnosti, uticaju i održivosti ostvarenih rezultata u implementaciji Programa.

## XI. OTVORENA PITANJA

### 1.)

Otvorena pitanja su pitanja koja imaju strateški značaj za razvoj Bosansko-podrinjskog kantona Goražde, koja su povezana sa aktivnostima Vlade Federacije ili aktivnostima drugih privatnih ili javnih lica koja su inicirana od strane vlade kantona u prethodnom periodu i za čije uvrštavanje u Program razvoja je neophodno donošenje prethodne političke odluke.

Otvorena pitanja za koja je neophodno donijeti političku odluku su:

1. Izgradnja Hidroelektrane u Ustikolini,
2. Vlasništvo nad državnim kapitalom u dioničarskim društvima na području kantona,
3. Izgradnja brze ceste Goražde – Sarajevo,
4. Izgradnja gradske zaobilaznice u općini Goražde,
5. Prostorni plan Bosansko-podrinjskog kantona Goražde do 2028. godine,
6. Rekonstrukcija mostova na Drini koji su u nadležnosti Federalne direkcije cesta,
7. Osiguranje ravnopravnosti u Federaciji BiH u skladu sa Deklaracijom Skupštine Bosansko-podrinjskog kantona.

### 2.)

Prilikom rješavanja otvorenih pitanja, svi nosioci-dužnosti u kantonu su dužni poštovati odredbe Programa razvoja.

## XII. ODGOVORNOST, SARADNJA I KOORDINACIJA

### 1.)

Odgovornost za postizanje ciljeva i rezultata je na Vladi Bosansko-podrinjskog kantona, koja će na implementaciji aktivno saradivati sa Federacijom BiH, općinama u sastavu kantona, međunarodnim institucijama, akterima civilnog društva i predstavnicima privatnog sektora.

### 2.)

U svom radu Vlada Bosansko-podrinjskog kantona će osigurati snažnu saradnju sa općinama u sastavu kantona u implementaciji prioriternih programa, projekata i mjera.

Posebna pažnja će se posvetiti jačanju institucionalnih kapaciteta jedinica lokalnih samouprava, posebno u općinama Ustikolina i Prača sa posebnim akcentom na osiguranje visokokvalitetnih javnih usluga uz pružanje podrške u ostvarivanju ciljeva lokalnog razvoja.

### 3.)

Vlada Bosansko-podrinjskog kantona i javne ustanove i preduzeća će uspostaviti što bolje odnose sa susjednim općinama u Republici Srpskoj, u oblastima kao što su povratak i rješavanje pitanja raseljenih lica, zbrinjavanja komunalnog otpada, turizma i svim drugim oblastima koje mogu doprinijeti stvaranju povoljnih uslova za razvoj Gornjedrinske regije.

Saradnja na ekonomskom, društvenom i kulturnom polju, u skladu sa odredbama Sporazuma o stabilizaciji i pridruživanju o prekograničnoj saradnji i okolišu, biće unaprijeđena i sa susjednim državama.

### 4.)

U cilju osiguranja što boljeg nivoa saradnje sa Federacijom BiH, Vlada Bosansko-podrinjskog kantona će osigurati dogovor o implementaciji Programa razvoja sa Vladom Federacije Bosne i Hercegovine u oblastima koje predstavljaju zajedničke nadležnosti.

### 7.)

U cilju dizajniranja i implementacije aktivnosti na djelotvoran, troškovno-efikasan i sveobuhvatan način, u slučajevima kada organi uprave nemaju neophodno iskustvo u provođenju korjenitih reformi, uvođenju novih procedura, pravila i propisa ili nemaju iskustava u implementaciji planiranih aktivnosti, Vlada kantona će obezbjediti neophodne



resurse za vanjsku visokokvalitetnu i profesionalnu, referentnu i programski orjentisanu tehničku podršku.

6.)

U cilju obezbjeđenja adekvatne tehničke i finansijske podrške, Vlada Bosansko-podrinjskog kantona će osigurati potrebnu tehničku pomoć:

- kroz saradnju sa međunarodnim institucijama u procesu planiranja i provođenja prioriternih reformi,
- kroz pozive za projekte kojima će se obezbijediti mobilizacija potrebnih resursa civilnog društva za implementaciju Programa razvoja,
- kroz saradnju sa profesionalnim organizacijama u cilju obezbjeđenja nedostajućih stručnih i tehničkih resursa kroz pozive za usluge.

### XIII. ZAVRŠNE ODREDBE

1.)

Impelemtacija programa razvoja počinje 01. januara 2011. godine i traje do 31. decembra 2014. godine.

2.)

Program razvoja će se objaviti u Službenim novinama Bosansko-podrinjskog kantona Goražde.

BROJ: 01- \_\_\_\_\_/11

DATUM:

PREDSJEDAVAJUĆI SKUPŠTINE

---

Nazif Uruči